

Koronavirus: Pelawat dari Wuhan, Hubei dihalang masuk ke Malaysia - Tun Mahathir
AstroAwani
29 Januari 2020
Hasimi Muhamad,

PUTRAJAYA: Kerajaan memutuskan untuk tidak membenarkan pelawat dari wilayah Hubei dan Wuhan memasuki Malaysia bagi mencegah penularan wabak koronavirus.

Perdana Menteri, Tun Dr Mahathir Mohamad berkata, sekatan itu dibuat terhadap mereka yang mempunyai bukti rekod kesihatan dan sebaliknya.

Bagaimanapun, Dr Mahathir berkata, pelawat dari wilayah lain di China masih dibenarkan masuk ke negara ini.

“Kalau mereka datang dari wilayah Hubei, mereka tidak boleh dibenarkan masuk Malaysia.

“Jadi, kita kesan sekarang ini tujuh orang yang ada bukti menghidap penyakit koronavirus,” katanya pada sidang media khas, di sini, hari ini.

Mengulas lanjut, Perdana Menteri berkata, pemeriksaan akan dijalankan di pintu masuk utama negara termasuk mereka yang transit di negara ini sebelum ke destinasi lain.

“Jika mereka dari Wuhan, kita harus menyekat mereka. Bergantung dari mana mereka datang.

“Mereka perlu menunjukkan pasport, dan menerusi pasport kita dapat mengesan mereka dari mana.

“Jika pasport mereka dari Wuhan dan wilayah Hubei, maka kita akan menyekat mereka,” katanya.

Setakat ini, kes yang disahkan positif jangkitan Novel Koronavirus (2019-nCoV) telah mencecah 6,052.

**© 2020 Astro Awani Network Sdn. Bhd.
(535275-D) All Rights Reserved.**

Source: <http://www.astroawani.com/berita-malaysia/koronavirus-pelawat-dari-wuhan-hubei-dihalang-masuk-ke-malaysia-tun-mahathir-229293>